

CBETA電子佛典集成

CBETA Chinese Electronic Tripitaka Collection
ebook

X26n0571

般若心經註解

清敬止撰

中華電子佛典協會



目次

- [編輯說明](#)
- [章節目次](#)
- [卷目次](#)
 - 1,
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

世尊在靈鷲山中。入甚深光明宣說正法三摩提。舍利子白觀自在菩薩言。若有人欲修甚深般若法門。當云何修學。觀自在遂說此經。即佛說大般若精要。傳至中華。今從玄奘所譯。般若者智慧也。波羅蜜多者。華言到彼岸。眾生由迷慧性。居生死曰此岸。菩薩因修般若。悟慧性到涅槃。曰彼岸。心者般若心也。此般若心。人人本具。說此經者。欲令眾生。斷除妄心。顯發本性故也。經者法也常也。經路也。此經以單法為名。實相為體。觀照為宗。度苦為用。大乘為教相。此五者。經中所說之旨也。單法者。即般若波羅蜜多也。實相者。即諸法空相也。觀照者。即照見五蘊皆空妄也。度苦者。即度一切業報苦厄也。大乘者。即菩薩所行甚深般若也。

觀自在菩薩行深般若波羅蜜多時。

觀自在。能修般若之菩薩也。般若波羅蜜多者。菩薩所修之法也。菩薩因修般若。觀慧照了。自心清淨。圓融無礙。故稱自在。此自行也。復念世間受苦眾生。令其修習此法。改惡遷善。離苦得樂。無不自在。此化他也。

照見五蘊皆空。度一切苦厄。

照者觀也。五蘊者。色受想行識也。蘊者積聚也。謂日積月累。妄想眾惡。藏於性內為蘊。空者真空也。色者色身也。即人身也。受者領納也。想者思想也。行者造作也。謂造作諸惡也。識者分別也。謂分別一切境界好醜也。識即心王。受想行是心所。度者度脫也。一切苦厄者。世間業報眾苦厄也。菩薩由觀照五蘊空寂。離生死苦。復憫在迷眾生。顛倒妄想。悖理亂常。不忠不孝。十惡五逆。致受眾苦。說此法門。令其修習。皆得解脫也。

舍利子。

佛之弟子。智慧第一。因其為眾請問。故呼其名而告之。

色不異空。空不異色。色即是空。空即是色。受想行識。亦復如是。

色即四大幻色身也。空乃般若真空性也。眾生由迷真空性體。而受幻色妄身。譬如水之成冰。堅固無用。菩薩由修般若。觀慧照了。幻色即是真空法體。猶如融冰為水也。然色之與空。其體無二。故曰色不異空。空不異色。如冰不異水。水不異冰。復恐鈍根眾生不明了。猶存色空之見不忘。故曰色即是空。空即是色。如冰即是水。水即是冰。若受若想若行若識。莫不皆然。此一經之要。般若之心也。

舍利子。是諸法空相。不生不滅。不垢不淨。不增不減。

諸法者。指前五蘊也。空相者。即真空實相也。菩薩復告舍利子云。既了諸法當體。即是真空實相。實相之體。本無生滅。既無生滅。豈有垢淨。既無垢淨。豈有增減乎。

是故空中無色。無受想行識。

此真空實相之中。既不可以生滅垢淨增減求之。故總結云。無色無受想行識無即空也。

無眼耳鼻舌身意。無色聲香味觸法。

真空實相之中。既無五蘊。亦無六根六塵。此空十二入也。

無眼界乃至無意識界。

既無十二入。亦無十八界。十八界者。六根六塵六識也。有六根對六塵。成六識也。五蘊十二入十八界。不出色心二法。為迷心重者。說為五蘊。為迷色重者。說為十二入。為色心俱迷者。說為十八界。以上三科修學之人。隨人根器。但修一科。即能悟人。

無無明亦無無明盡。乃至無老死亦無老死盡。

此空十二因緣也。無明者癡暗也。謂於本性。無所明了。非瞢然無知。乃違理強覺之謂也。無無明等者。菩薩以般若智。觀此無明。其性本空。無生滅相。故云無無明亦無無明盡也。無老死亦無老死盡者。義與前同。生相者。無明緣行。乃至生緣老死是也。滅相者。無明滅則行滅。乃至生滅則老死滅是也。此十二因緣。亦名十二有支。生從無明生。則一切生。滅從無明滅。則一切滅。若無無明種子。根莖何來。因此十二因緣。妄想生滅。纏縛自性。受苦無有休息。頭名無明。亦名煩惱。亦名種子。二名行。謂造作諸業。此二支前世所作。惡業種子也。三名識。謂起妄念。初托母胎也。四名名色。從托胎後。漸生諸形相也。五名六入。於胎中成六根。而通竅也。六名觸。謂出胎後六根。對六塵而生喜好也。七名受。謂領納世間好惡等事也。此五支現在所受之果也。八名愛。謂貪染世間五欲等事也。九名取。謂於諸境好醜。生取著心也。十名有。謂作惡業。造有漏之因。能招來世之果。此三支現世所作之惡因也。十一名生。謂受來生五蘊之身也。十二名老死。謂來世之身。既老而死。此二支來世當受之果也。蓋此十二因緣。該通三世因果。何見人生禍福。已定此善惡因緣。不肯脩行。妄求富貴安樂。何益不造。無業無縛。即得清淨法身。若造惡業。展轉因依。如輪旋轉。無有休息。一切眾生。迷而不知。良可悲也。故菩薩說此心經。勸誘於人。依而行

之。可出苦輪。此本緣覺之人。所觀之境。大乘菩薩。徹照此境。皆無實性。故云無也。

無苦集滅道。

無苦集滅道者。觀四諦清淨也。苦即生死苦果。集是惑業苦因。此二者世間之法也。滅即涅槃樂果。道即道品樂因。此二者出世之法也。說此四諦者。令眾生知苦斷集慕滅脩道。離苦得樂也。此本聲聞之人所觀之境。大乘菩薩照了此境。當體空寂。故云無也。

無智亦無得。

智般若之智也。菩薩以智照境。既無五蘊及四諦諸法。即人法皆空。智境俱泯。如病去藥忘。故云無智亦無得也。

以無所得故。

此結前起後之言。

菩提薩埵。依般若波羅蜜多故。心無罣礙。無罣礙故。無有恐怖。遠離顛倒夢想。究竟涅槃。

菩提薩埵者。能依之人也。般若波羅蜜多者。所依之法也。菩薩之人。依此法門修學。功成理顯。故得心無業縛。因無業縛。故無生死恐怖。既無生死恐怖。則無顛倒煩惱。此三障既空。三德乃顯。故云究竟涅槃。涅槃者。華言大滅度。大即法身。滅即解脫。度即般若。此三德非別有即三障。是迷即三障。悟即三德。所謂生死即法身。煩惱即般若。結業即解脫。然雖障即是德。自非般若之功德不能顯。譬如磨鏡垢盡明現。斯之謂也。

三世諸佛。依般若波羅蜜多故。得阿耨多羅三藐三菩提。

三世過去未來現在也。阿耨多羅三藐三菩提者。華言無上正等正覺。此言非惟菩薩如此修證一切諸佛。莫不皆修般若。得成正覺。

故知般若波羅蜜多。是大神呪。是大明呪。是無上呪。是無等等呪。

前是顯說般若。後是密說般若。然既顯說。而又密說者何。良以。眾生根器不同。所入有異。曰神呪者。蓋言般若功用。能破魔障。名大神呪。能滅癡暗。名大明呪。能顯至理。名無上呪。極妙覺果。無與等者。名無等等呪。

能除一切苦真實不虛。

此結般若功用廣大。除苦得樂。決定無疑。令諸眾生信受奉行也。

故說般若波羅蜜多呪。即說呪曰。

揭諦揭諦 波羅揭諦 波羅僧揭諦 菩提薩婆訶

[CBETA 贊助資訊](#)

(<https://www.cbeta.org/donation/index.php>)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號: 1 9 5 3 8 8 1 1

戶名: 財團法人西蓮教育基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
